

偶齋詩草內次集卷九 以下社草

宗室寶廷竹坡著

祀竈曲

一五祀兮神秩崇秉火化兮民有功司民命兮亮天工  
古祭以夏兮今祭以冬馥管周兮序將終勤洒掃兮仙  
廚空沈檀爇兮寶炬紅瓜餉設兮遯之東芻兮豆兮靡  
弗供稽兮柏兮庭下充再拜稽首兮敬以恭維神之正  
直兮旣明且聰臣自有命兮天難窮通自知疏狂謬妄  
不堪載福兮不敢媚神以取容願神上登九天兮撫彗

星而掃太空驅南交之魍魎兮入西溟以降毒龍逐狐  
狸而屏鬼蜮兮躋斯世於和豐臣終老亦無悔兮甘守  
困窮朔風起兮寒雲結寒雲結兮飛白雪柏葉然兮香  
煙騰香煙騰兮神將行風颯颯兮如聞馬聲火光入雲  
兮雲朱殷煙雲相繚兮隨風上天

遊僧

颶風捲霧迷靈山龍池水濁禪難安迴光傳聞照震旦  
西來道路何漫漫海澨山陬隨所之到處聞見多新奇  
如何今日中華景不似達摩東渡時

塔燈

窈堵波立當東風金輝閃爍堆重重月華互映相玲瓏  
多寶耀彩搖沖澗舍利幻影光熊熊火珠一顆銜當中  
曇雲高裹春霞紅阿育八萬施鬼工佛光默運宣神通  
祇愁一炬如雷峯崔嵬壯觀頃刻空

醉後贈韻清族姪

吾宗韻清姪才大數偏奇酒醉有千日巢居無一枝將  
軍難好武壯歲但工詩此際堪投筆封侯儻未遲

相見卽飲酒酒酣同淚潛怕人言 祖德愧我值時艱

戰艦連江海烽煙結觸蠻屏居歎衰病莫負爾朱顏

冬至

乾坤冰雪滿萬物盼春回長夜至此極新陽何日開  
瓶枯瘁溪菊盆小屈山梅氛祲消難盡愁登望氣臺

半載軍書急數州民命危艱難歎今歲晦塞況斯時謀  
國良臣智推恩聖母慈不才之經濟沈醉酒盈  
卮

去歲逢冬至錢塘遊未還風翻滿江月影凍半湖山  
舊夢愁難說窮居喜得閒妻孥幸懽聚令節暫開顏



天氣今朝好溫和衆意宜人閒忘日短梅早覺春遲  
卒歲尙無策消寒先有詩良儔晚相會痛飲不須辭

題圖旭峯先生春郊試馬圖遺照 二十四韻

能取難常守居安莫忘危前賢留妙繪詰嗣倡佳詩  
西域初開日 中朝全盛時州分新道化庭溯後車師  
水急地愁險峯昂天讓奇孤亭深綠隱密樹亂紅滋  
春晚遊人少郊荒試馬宜移官懷勝概寫照寄遐思  
畫肉殊唐幹怡情異晉支藉茲備攻戰豈是恣遊嬉  
烽火秦關起軍書朔漠馳百年同版籍萬里忽瘡痍  
瀚海泉生血

陰山雪葬尸烏孫嗟早沒龍種歎無遺 聖代嚴征伐

元臣秉節麾方籌子房箸已識順昌旗

謂張朗齋劉毅齋二帥 指

顧摧疏勒從容破月氏屯田猶古制定界擴前規西域  
重開遠東方轉運遲兵多憂潰變戍久慮飢疲瞻像清  
高仰披圖鑒戒垂未能習鞭弭焉望固邊陲投筆心空  
在乘槎志所期樓蘭如許斬革裹亦何辭

冬日歎 用杜少陵夏日歎韻

冬日朔風冷窮民紛滿街齊燕同水災賑濟倉屢開三  
九無快雪時序似少乖積水久不涸千里無塵埃死者

隨波濤生者臥沙泥菽麥敢望食難覓蒿與萊縣官如  
木偶吏役如狼豺 朝廷費銀米小民安得哉災沴歎  
如此陰陽何由諧窮居自閉戶困守誰與偕

冬夜歎

用杜少陵夏夜歎韻

冬夜醉不寐隱憂結中腸閒居憂何事言念古越裳海  
雲壓危城寒月昏無光礮火赤燒空朔風不知涼蠻煙  
護黑旗百尺獨飛揚死守待援師盜賊明網常慨彼蝸  
角鬪悄然思海疆津門達瓊崖萬里遙相望微聞嚴征  
繕竭力籌炎方堅冰凝溟渤暫無憂此鄉空庭有寒鳥



休巢不敢翔守拙聊自安温飽卽樂康

冬日歎

唐花盛冬日擔送滿六街薰蒸藉糞氣未春先竊開但  
矜人力大不畏天時乖牆陰有枯竹風折委塵埃勁節  
無由見枝葉汗雪泥臥地重不起壓頭仰蒿萊狐狸恣  
占據自恃無狼豺苦寒鬱陽和晏序洵悲哉臘鼓爭喧  
呶里耳鄉音諧松孤梅復癯歲寒誰與偕

冬夜歎

夜寒飲不下磊砢盈愁腸做裘聊覆體何處無衣裳殘



燈不滿室隔窗見月光破爐温我足火燼灰未涼窮愁  
夜增劇心餒氣不揚屏居况歲晏困頓殊尋常京華多  
苦境豈必羈邊疆京營甚遠戍擊柝宵相望飢寒生貧  
賤故里同遐方市城謀生難温飽羨村鄉慨彼號寒鳥  
更深猶孤翔倖生誰暇養安樂輸嵇康

踏燈詞

放眼乾坤醉不勝今宵馬齒又新增余正月閒居飲罷  
既望生渾無事月下隨人共踏燈

士女喧嘩滿路塵燈光月色一般新誰知寶馬香車後

不少鳩形鵠面人

紅燭籠紗照九衢  
稗官遺事細描摹  
阿誰別選丹青手  
畫出監門舊日圖

初春感懷

春燈踏罷事全無  
朝夕沈酣酒一壺  
室暖唐花開更速  
天寒宿草凍難蘇  
孫吳至此空齟齬  
儀衍於今亦丈夫  
閉戶靜觀增感慨  
豈因貧賤歎窮途

吹面風涼酒易醒  
尋春散步愛郊坰  
冰開流水中分綠  
雪盡遙山暗透青  
事業但看人建樹  
光陰豈爲我留停

閒身祇合常遊蕩已是年華卅四經

春日閒居四首 用杜工部春日江村韻

小院韶華好閒居已一年雪消見春草冰破出新泉  
陋巷稀人訪空檐任燕穿興來惟痛飲生計有蒼天  
待看韶光滿園林盡紫紅時花驕煖日枯木負春風好  
酒漸成疾早衰渾似翁幽懷誰可語隨筆託詩中

曲徑茁新草荒庭枯舊苔試看向陽木誰是出羣材  
壯志此生負牢愁何日開陰寒猶似昨虛說已春來

始識閒居趣回頭已半生家貧愁得子官罷悔留名夢



裏有成敗醉中無辱榮夜來應落雪倍覺助吟情

白酒

一樽春酒與君嘗醉裏溫柔是此鄉肯爲薰蒸更本色  
恥因酷烈失真香穆生設醴名原重漁父餽糟味最長  
祇恐過甘容易敗廿年交際默心傷

夏至偶齋小集分韻得我字

窮通命由天憂樂心在我萬事有自然一身無不可因  
狂轉得閒借病漸成惰閉門醉不出世路忘坎珂消夏  
偶小集客來亦頗夥信口占詩詞隨手啖蔬果乾坤本



寬平醉臥最安妥且共消長晝窗外日如火  
死後盡由人生前本無我儒家論順受釋氏譚因果無  
能恥求福有命慵避禍消磨詩酒閒此道庶乎可身惟  
閒易安地以平能妥豪氣不須存笑口何妨哆天熱畏  
多飲日長厭久坐相將同醉眠得暇且疎慵

三伏日同人遊昆明湖分漢字韻

酒酣步長隄良儔共遊玩倚筇一凝眺暮色昏難辨月  
上湖水寬雲生山影亂金牛傍橋臥依稀望河漢天邊  
宮闕高無人空夜半

綠陰曲

滿城桃李春爛漫交開錦繡人爭羨韶華彈指幾多時  
綠陰寂寞閒庭院春風一過再尋難幸得枝頭結子繁  
秋來敢望薦盤箸聊報年時培植恩

苦旱

去年天下澇豫盡今年雨雨工倦欲眠息勞臥紫府飛  
廉竊作威呼號示雄武赤松避盛勢安居不出戶有霖  
不敢作坐視小民苦商羊自炷亟非時空自舞點滴偶  
然降杯水亦何補上蒼豈無澤甘澍每中阻側聞我

聖朝祈禱典具舉發倉賑復糶遐邇霑被溥水旱歉連  
年才遺存幾許矧當邊多患強鄰視耽虎烽煙累市廛  
折閱及商賈所幸民志固荏苒跋扈內患難盡除誰  
暇慮外侮人心孚 皇恩天意眷 聖主行看時雨足  
勃然生禾黍南交兵已弭暫喜靜鼙鼓縱不免餓殍究  
勝死矛櫓哀病怯顯榮貧賤忘建樹惟祝歲豐穰飽食  
養兒女

夏日閒居

近市炎歊甚窮樵戶自關不才逢世變未死得身閒隱

思誰填海常貧難買山愁來惟痛飲憔悴藉酩顏

夏閩思

三年夫婿戍炎陬悵望薰風獨倚樓見說南關軍盡退  
此行可惜未封侯

旌旗指日返南陬涕溼羅衫懶上樓早識長纓難繫頸  
當初深悔覓封侯

夏日卽事

閉門窮巷自栖遲正是中年習靜時愁豈能消聊飲酒  
心無可用且攻詩甘霖空潤牆頭草烈日難暄樹下葵



萬物生機富夏密閒身歷覽破幽思

最是閒居日更長新晴天氣似秋涼  
庭花經雨根穿砌鄰樹隨風影過牆  
老近漸知歸樸實途窮翻恥效猖狂  
故人多有能詩者酬和時時共舉觴

### 喜雨

望澤人休躁作霖天有時風狂豈能久  
雨好不妨遲旱魃泣荒塚枯魚騰涸池  
無田漫笑我菊已種東籬

### 夏日田園雜興

罷官無事願歸田築室山邊或水邊  
園有果蔬堪下酒

家收菽麥不需錢讀書學稼農中士戒殺茹葷佛外禪  
閉戶屏居聊謝過原非高蹈隱林泉

附郭山多路未遙舊居猶在傍僧寮前村酒美兒能貫  
後院花多女代澆買竹無錢移野荻題詩之紙折窗蕉  
閒居每欲聞邊事不忍遷家遠市朝

州宅何勞元九誇幽閒爭及埜人家牆隨水築無妨曲  
窗對山開不礙斜小徑苔深嵌碎石荒畦菜少補時花  
門前故使生荆棘怕有嘉賓偶駐車

僑寓平坡卅歲更舊聯猶記帖軒楹忙朝北闕還如

夢穩臥西山得此生

先君罷官借居平坡山下鍊荔崖先生丙舍得三四兩句適先師王

我齋先生子麗珊至屬書之帖齋壁三十六年矣

命薄依然成廢棄家貧何處

計歸耕簪纓簞笠同慚愧嚙語迷離且共賡

屏居近市安得所謂

田園既以為題聊以寄興吟成不禁自笑諸君姑作嚙語聽之耳

### 伏日

朱明候方盛素節氣已藏三庚殿炎序酷烈猶未央

蜩晝孤吟熠燿宵偕行微物應時動感觸從陰陽羣忻

漏正永孰察景漸長堅冰基一陰何待凝履霜

俗說初伏百日

必見冰蓋

節已霜降暑逼物胥畏寒遠人漸忘濟陰有黃石心豈



識炎涼

潦漲蛙爭喧廚熱蠅聚飛借問此何日正當三伏期朱  
火行未艾白藏蘊有機休驚勢炎炎作威餘幾時割肉  
朔兔責魚羔憚蹈危伏閉笑虛文順時慎自持豈無鎮  
心瓜熱中疇能醫羅紈休憚勞轉眄金飈來

林鐘甫動律鶉火俄退栖溽暑率已厲寤寐茫若迷金  
虎兆甘澍屏翳惠肯來炎歛一朝洗徹夜仍淋漓乃知  
如焚候亦有清涼時天心迥難測造化涵真機感此悟  
人事倚伏相盛衰寄言避熱者靜坐毋櫻懷



義輪轉南陸赫赫當中天  
臨池快張飲消暑推達官  
雨足草木茂蒼翠如勾連  
枝柯互相蔭火織徒高懸  
園葵傾仰久中心暄以乾  
逾時弃不采枯萎難升盤  
朔方炎暑薄三旬彈指閒  
炎蒸念南交瘴癘良足歎

### 西瓜

崆峒傳貴種王母昔曾食  
莫笑質輕浮誰知心本赤

### 古風

幔亭度仙曲盛會傳武夷  
姬衰羸正張約連相傾危  
三代聖王道至此一轉移  
神仙慨世變權笑函傷悲  
凌夷

四千年間君知不知當時人閒世詎足云可哀

宋有社稷臣萊公仰忠勇高坐澶淵城北軍不敢動飲  
博偕大年以暇且好整當時無此人真宗焉無恐和戰  
盡常事衆論空洶洶英主無能臣疇肩軍國重

天津二月時帆檣多若嶮朝入乘海朝夕出隨汝水河  
水復海水朝夕相遞流外人如中人日日城下遊城邊  
何所有蜃氣排層樓雙輪夾戰艦旌旗紛耀眸借問此  
安爲難辨何處舟和盟久開禁出入頗自由他族滋偏  
處所幸無陰謀登高試西望隱約見 臯州

病鶴

霄漢翱翔力已疲  
仙遊曾記飲瑤池  
乘軒恩未酬當日  
聞埜聲難似昔時  
將死哀鳴惟子和  
離羣獨立任雞欺  
此生莫遂銜珠願  
瘞骨留銘亦自悲

小遊仙

玉京無事敞天門  
竟日羣仙倒酒樽  
笑殺金仙極樂國  
靈山一任海波吞

鯤鵬變化妙難參  
伏處寒門性豈甘  
寄語大吳須早備  
扶搖風起待圖南



童女童男自締姻風濤無處訪三神子孫底事渾忘祖  
不學嬴秦學大秦

廢園

殘荷敗艾滿溪灣醉坐松根淚欲潛寄語詩人休感慨  
牆頭回首見三山

詠懷

年景歎淵急晏序已季冬冰霜枯萬卉凜冽九域同生  
機幸未歇一陽氣已通指日泰運啓玉衡北轉東但恐  
陰潛伏且霾嗟恒風陽和難遂望沍沍凍遲消融四時罕

佳日寒燠多違中杞懷枉自抱氣候有天公

夜起不能寐寫憂步中庭仰首望河漢斜亘東南橫昏  
昏者何宿云是牽牛星年年秋至渡如何風浪生天錢  
糜十萬罪重罰已輕織女空代僵跋彼日不停衆星多  
如民含動無時甯析木誠要津槎客莫徒行天船待利  
濟舟楫豈虛名

仰首望太虛天心不可窮俯身觀大地四海流相通開  
卷觀古今萬年何匆匆治亂若遞嬗強弱互爭雄慨然  
獨長歎舉酒一吸空

馮夷司百川命螭代切和豈知所司分水衆神孔多涇  
涓旣異派濟潔亦殊科螭靈效奔走秉承徒唯阿和衷  
自古難私懷每偏頗蛟螭尙爭食況復龜與鼉淇園竹  
已罄瓠子何日歌桃花開恐早時哉勿徒過

我少不自振爲學多因循文戰每不利屈抑難求伸羨  
彼鄰家子才技奇且新無聊且樵倣勉強思效顰習之  
亦有年依舊不勝人所學僅皮毛焉能得其真及今乃  
自悔凡事須探原學步失故步終慚落後塵

家貧用弗足有急需稱貸得此救急術用之更糜費暫



時雖足用日久終爲累縱使善營謀未利已有害何如  
勤務本自古儉爲貴

### 水雷

豐隆天吳戰滄海阿香車溼推不起霹靂一聲出地底  
洪濤百丈飛空翻魚鼈蛟蜃隨上天神龍抱珠驚不眠  
雷發海破船鐵裂萬斛巨木漂碎屑三山動搖若木折  
江頭索橫錐直立守險無人枉資敵徒有利器難爲國

### 肩擔兒

肩擔兒一日行數里非兒重難行耶飢足不起荒區乞

食食無幾不如將兒易斗米明知米盡終難生免見同  
餓死

嗟來食

嗟來食古人死不食今人來食不可得一人之食食十  
人人衆食寡何由分莫嗟食難飽勝如嚼枯草

再題圖旭峯先生春郊試馬圖遺照

城東天山高接天城西黃河流繞山一亭翼然當其閒  
緋桃絲柳左右環圖公觀察舊此官文臣不敢忘弭鞭  
春來亭下馬自盤是時乾隆方中年二萬里關西疆新

雨露徧洒邊無塵瀚海滌淨羣羊羶□□□□□□  
作圖寄懷戒宴安非同武子癖有偏□□□□□□  
百年盛衰慨指彈兵氣西捲遮陽關天山南北分烽煙  
戰血下走黃河殷烏孫汨沒連大宛神駿瘠倒渥洼乾  
聖朝赫怒重開邊西域再通銷戈鋌強鄰侵地斂手  
還定遠生入歌凱旋吾聞車師分後前堅城鎖鑰居中  
權西餉東供轉輸艱充國深算惟屯田披圖反覆頻浩  
歎得地尙易守地難嗚呼得地尙易守地難

浣衣曲



昆明湖畔芙蓉堵芙蓉花下多浣女有客看花來水邊  
偷聽浣衣人笑語水聲搖簸襪人聲花氣薰衣不知暑  
鶯嬌燕媚各分明小姑中婦皆儔侶就中有嫗鬢如銀  
倦息花前同暢敘自云居近華家屯海淀移居自吾祖  
百餘年來事變多見聞具在堪畧舉憶昔乾隆全盛時  
此地繁華天下推璇宮大慶民同樂四海呼嵩高更  
祝釐昇平歌舞窮百戲遠近梯航王會開中山樂  
浪不足道萬里南交來阮黎更道遠人曾入貢紅毛碧  
眼相形奇營旂八色接健銳凱旋實勝傳兩碑閱武

樓高傍湖堧四時習戰屯虎貔扇子河邊樹夾路柳陰  
花影青紅迷百官車馬響流水雞鳴不斷斜陽西咸豐  
一自庚申歲郊垆頃刻騰兵氣荏苒魍魎共橫行玉宇  
瓊樓盡摧敗薰天一炬湖水乾從此三山不忍翠灤陽  
迴首五雲迷湘纍泣水宮門閉靈區荒廢廿餘秋雉兔  
芻蕘任竊遊差喜崑岡延未盡亭臺幾處幸仍留焚餘  
嘉樹多枯槁長林伐盡賸豐草積潦淤泥輦路湮蛙  
聲聒耳蟬聲少瓊島瑤臺石色朱牆壁苔焦窗牖無  
村童坐老恣垂釣福海水汙難得魚重脩亦有新池

館庭空徑寂無人管幾回欲往總中停愈遊心愈增憂  
 懣聞說 長春慶五旬湖山無福再沾 恩 御園花  
 草能多少難慰 深宮宵旰勤昨傳聞海水橫飛鏖戰  
 雞籠未解圍舊恥新仇今可雪憤來自恨不男兒我聞  
 此語心骨悲用成句 迴思故事涕沾衣記從老父來僑寓  
 倖及昆明未劫灰

秋蝶

老去莊周夢漸醒蘧蘧猶記幻中形半生有累因花誤  
 餘日無多任露零亭午已過衣莫曬涼飈初起翅須停



三春迴首真如昨錦繡園林路慣經

七夕歌

銀潢皎潔星如煙大星小星光相連  
姮娥側立仙桂邊偷窺半面猶未全  
璇閨結伴開綺筵斜輝一綫鍼暗穿  
彩虹忘架呼鵲填橫漢底事無天船  
天孫慎毋與人巧人巧若極將欺天

和王封亭說鬼行

東坡喜說鬼人不能說姑妄言封亭喜說鬼以詩代說  
傳兩篇我今說鬼不同二公說二公說故而我說其新

我聞越裳遠界西南邊連年戰鬪多煙塵中有劉將軍  
立志盡殺西洋人犬旂百尺搖墨雲黑影倒射紅河渾  
蓮花萬朵破雲下火流滿地號冤魂刀光掠處夷首萬  
千墮血雨濺旂旂朱殷又聞雞籠山倚閩海隈上有崢  
嶸突兀之高臺大舟十丈衝潮來轟然一聲臺立摧巨  
石迸火橫空飛人隨石裂同成灰順昌一怒施神威曹  
劒鼓勇重合圍始知魍魎之技止此耳可惜戈船下瀨  
難窮追彭田之山馬尾之水山雲照水如霞紫戰血凝  
江波不起聞說孟秋之上旬張公督師戰於是萬雷同

皆發水中天吳心悸掩雙耳七艘戰士盡摧殘楊太舟  
多亦焚燬洪鑪一燼骨難留卻羨沙場斷頭死水爲壙  
兮舟爲棺千人同穴隨狂瀾英魂滿江盡含笑鯨鯢擊  
破難生還夷會傷死連朝苦戰蒼山麓我軍死水敵死陸華  
夷戰鬼聚一江月黑煙昏暗相逐吁嗟乎哀此新戰鬼  
忠勇疇與比滄溟浩淼一萬里南北到處輪帆駛安得  
海疆戰士忠勇盡如此何憂百萬強敵不推毀吁嗟乎  
古今惟有戰鬼最可說我輩覩然人面慚苟活今宵恰  
值中元節用和佳章弔忠烈詩成燈燼老眼昏墨痕滿



紙暗淡凝如血

和王葑亭後說鬼行

若有人兮海之洲鐵爲車兮火爲舟東西南北大地九  
萬里罔不梯山航海邀以遊其性似魚兮習水而善泅  
其音似鳥兮格磔而鈎轉其形似獸兮擬猩猩而肖猿  
猴高顴而隆鼻兮赤髮紫須而碧眸其色之正黑者羣  
呼爲鬼兮其白者實亦異類而同儔其心不明倫理而  
獨巧兮貪利無厭而多謀下之九淵之深無鱗而不憚  
潛入兮上之九天之高無翼而不難凌虛以上浮極之



日月星辰雷電風雨無不敢強推而妄測兮漸至水火  
金木之氣皆欲竊取而私收製爲火器以殺人兮欲才  
遺之無留自謂天地造化盡能曉兮而於生人倫紀之  
道則妄求吁嗟鬼兮禽獸伍高言天地兮不知有君父  
身爲男兮反尙女有財誰念橋梓恩無媒率諧鸞鳳侶  
以攻奪行其教化以殺戮佐其商賈以火器糜爛四海  
之生人兮而妄尊救人爲天主詐欺蠱毒迷蠱狠懾豺  
惡脅虎無論慶忌於螭俞兒有用之鬼兮非其倫卽彼  
倍阿鮭蠶沃陽罔象及夫萃夔方皇委蛇之流胥不可

以同日語縱有夏之葦菱殷之螺首周之桃栗兮亦難  
祛出九州中又豈神荼鬱壘之所能餐終南進士鍾馗  
所勝捕靈鷲兮干雲恆河沙兮無垠陰風一捲兮香國  
生塵三山高兮插霄漢瀛洲深兮波浩瀚徐福子孫兮  
干復萬黎邱一過兮衣冠變佛兮仙兮何其甘讓鬼吁  
嗟世運之使然兮亂何時而甫弭如來太息兮羣仙含  
涕沫泗之流幸而未絕兮焉能禁他族之僭而處此吁  
嗟鬼兮不可以久居王母赫怒兮將行天誅然嶰谷之  
竹以爲燔兮書元圃之桃以爲符傾瑤池以洗乾坤塵

土兮合八埏八紘而被除行見大同之邇治兮又何畏  
乎魍魎魍魎之挪揄噫悠悠大志兮何時成憂來無聊  
兮再和說鬼行

秋角詞

彭田山巔秋月上馬尾江頭夜潮長西風捲浪湧沈舟  
一聲畫角羣山響角聲驚起寃魂哭啾啾咽咽聲斷續  
滿江陰霧月無光燐火紛飛襍紅綠門空五虎關自開  
血黏亂石頽高臺角聲隱約礮聲絕漁船夜半乘潮來  
啓明星高殘月小角聲一動秋天曉將軍秉節出嚴城



白髮垂頭不知老角聲吹斷鼓聲鳴士卒歡呼戰馬騰  
行人入耳忽驚駭不是沙場噍殺聲

川鼠歌

川有異鼠圓身而猪喙貓食輒死志白石太守宦  
於川曾見之消夏六課以之屬題爰倣樂府體作

川鼠歌

川鼠川鼠貓不可捕不知誤捕鼠毒殺汝

一解 貓食鼠兮

貓之常常不可狙兮變當慎防貪厥肉兮遭厥殃

二解 川

鼠復川鼠貓畏死弗敢捕畏死不敢捕胡以對汝主

三解



猫捕鼠兮猫之職汝盡汝職兮毋貪其食彼鼠縱毒兮

害汝烏得

四解

冬蕉 三冬詠

三更窗外雨聲凍翠旗冷壓雪花重孤客宵長耳不眠  
鹿角解殘慵入夢北風打葉綠天寒紙僵手顫作書難  
寄言君子本同調餘芳無幾休輕彈

楊烈姬行

并序

楊烈姬山東諸城諸生丁毓蒲姬也初爲邑王氏  
婢後歸丁丁富家能詩有豪氣喜揮霍不屑事家

人生產多姬妾姬入門晚家已漸落久之遂貧弗  
支姬乃以紡績針黹供丁飲食有不足則乞貸於  
故主而徐積資以償之如是十餘年丁賴以活雖  
飢寒勞瘁不爲苦也會年荒丁老且病死無以斂  
姬徧告宗族罕應者哀痛欲死或試之曰汝果能  
殉當任葬事姬泣拜而去遂乳藥丁乃得葬年未  
卅也諸文士聞之爭爲詩文紀之邑令亦詣拜焉  
泥濘雖淺如江之清參昂雖小如月之明賢哉楊姬烈  
且貞清逾水明逾星解忠直不必大僚賢烈不必大婦

但求盡此心實賤復何有烈哉楊姬雖賤不朽解二未共

其甘獨任其苦為救君飢厚顏故主何以償之惟妾手

是取君無一錢妾有十指殫妾十指勞緩君十年死有

姬若此何須孝子解三生無以養勞身養之死無以葬舍

身葬之為君死骸棄妾生命君骸苟安妾死亦幸叶噫

古來殉夫者多矣而每出於情好之私烈哉楊姬實得

乎從夫之正解四

### 火扇

雞毛拋棄糞壤中拾取作扇鷺羽同當爐鼓煽頗有風

風火相助氣自雄得時棄物成用物豈能耐寒能附熱  
篋中紈素恩久絕皎皎漫認成霜雪

冬筍

蒼天生成凌雲物嚴寒禁錮終挺出芽銳不待驚凍雷  
根深何憂封臘雪奇方自古難遂生出頭不幸遭劇掘  
莫嗤皮相劇粗疏須識中心自淨潔尤物從來聲價高  
京華消寒誇盛設本來有味擅清甘魚肉腥穢羞同列  
俗口凡牙恣嚼咀垢膩烹煎涅素質何如棄擲富陽山  
留取千霄昭勁節



鑿冰行

北風捲地殘月明燈火繞岸光照城人聲喧呶鑿聲急  
城河四九方打冰五更月落風愈烈玉局縱橫百道裂  
波心湧出萬點星亂雹斜飛襍晴雪于闐河溢崑岡傾  
大玉小玉相拖行睡驪驚醒臥難穩鐵車銅鼓當頭鳴  
吾聞至柔莫水若嚴寒凌逼竟化石可憐柔質暫成剛  
一旦無端受椎鑿三庚酷熱晝如年火織當空欲避難  
共說調冰堪卻暑誰思采取不勝寒衝寒作苦凍擊齒  
利競蠅頭忍拚死羨他赫赫伐冰家坐致黃金逾倍蓰

海門東望路悠悠凍合津沽潮不流蛟蜃難行魍魎阻  
三冬高枕且無憂

冬陰

殘冬望雪甚望雨天心應憫人心苦濃雲在望豈徒然  
未知祥靈降何許豈真上天故屯膏總爲飛廉中作阻  
山陬海澨每遍霑普澤獨何慳沃土麥苗屈伏畎畝閒  
馬踏牛喘蓬蒿伍久枯憔悴已難禁微霰雖霏亦何補  
莫嗤宿苗少生機有益民生勝禾黍虛拋嘉種值幾何  
黎獻春饑恃誰哺幸賴秋霖入土深歷盡嚴寒根不腐

滕六司令亦有權素餐枉負居天府空勞雲將屢吹噓  
聚散隨風力難禦須知陰晴亦有數天氣所之天莫主  
寒序從來惠澤稀豈能長久同溽暑慎勿躁競學握苗  
留待時來甘雪溥天心仁愛本無私鹵莽殘裂原自取  
最愛東坡小題詩能大放厥詞而不  
流於漫散陳腐試一倣之終不似也

### 弔孔武壯王墓

皇朝異姓難得王功豐福晉多覆亡滇閩反噬甘不祥  
粵藩有後差意強惟王忠勇百世芳茅土雖短俎豆長  
殊勛丕著追鷹揚餘氛掃蕩澄沅湘桂林戰血花淋香



水纒組帶山劍鉞忠魂戀戰忘故鄉生死誓必平南方  
遺塋二百年久荒行人展拜同感傷草多樹少門無牆  
黍禾茂密啼寒蜚穹碑露額明日光古殿巋然巍塚藏  
四時官祀勞太常忠臣何需後鬪昌鎮南祠墓遙相望  
樹枝拱北標忠良

尚王墓在衡水西聞王墓木枝皆北向亦一奇也

嗟彼吳耿

難頡頏海波西來漂越裳龍川象郡嚴邊防王生報  
國沒敢忘靈旗默助驅犬羊區區他族烏敢當當年定  
南收巖壘我祖憲王同戎行鴻功駿烈相輝光上媿十  
亂姬與姜愧茲孫子汗天潢武功廢棄空文章翹瞻海



嶠徒愁腸閒身何敢談安攘

春菊

淵明大笑詫奇絕秋花竟有逢春日滿園桃李盡無顏  
陽回三徑東風疾逢春豈有爭春心獨立原非豔陽質  
不因蕭殺變貞心肯爲溫和柔傲骨東皇有意憐孤芳  
特將雨露酬霜雪共驚壽客換童顏莫謂高人改晚節  
衰榮任運本天機隱見非時詎人悅莫作唐花一例看  
生性由來不附熱

商立戈鼎歌

俞公示我立戈鼎限以歌韻命作歌鼎高五寸銘一字  
其光黝然非刮磨周塵秦土繡古翠千年海苔枯老螺  
子殷制器有銘始博攷載籍良縷覲桑林禱雨用寶器  
制作一代垂猗那萃野虛傳俎共負傳巖亦說羹作和  
武丁彤日驚雉雒事神煩亂疑譴阿安州晚出數有六  
真贗莫辨徒摩抄宣和元年蔡京等進安州所得商六鼎我聞古器多戈  
象爵獻尊鼎相列羅父癸父甲並珍貴橫立異形原同  
科戈取傷人用示戒舊說相述疑謬訛我道古人有深  
意毋忘武備視此戈橫戈示偃直示用修文奮武無偏

願牧宮天誅移夏鼎兼攻取侮勛魏我三年伐鬼繼駿  
烈毋偏處此茲族他安當思危治思亂要言不煩安在  
多銘以自警忱心目慎守神器休媿嬰周衰文盛昧古  
訓大臣退食虛委蛇鐘鳴鼎食安酖毒坐看鼎沸爭山  
河強鄰鼎立恣侵奪止戈爲武倒太阿鹽梅濫調謂餽  
覆功垂彝鼎人誰何喜君有鼎願自愛嚴防攘竊來羣  
魔商鼎之歌止於此吁嗟吾意其蹉跎

後關河行

朔方萬水趨析津東爲一河東海奔隆冬腹堅巨流斷



番舶路阻難鼓輪商旅抑鬱關吏躁日望解凍迴陽春  
今年春遲且寒重七九已過猶不溫我心獨與衆人異  
寒恒天意當有因渤海遠與西海接華夷萬里如比鄰  
關江有沙固天險潮頭一湧低全吞吳越強弩縱滿岸  
詎必射回龕赭門 神京咫尺一水達飛濤或恐驚重  
關安得元冥再返旆凍膠斗柄難迴寅吾聞北方黠利  
虜遷都特近西海濱又聞西方倫敦島臨海立國除城  
闕驚濤駭浪豈不畏蹈危何以能久存東風指日釋寒  
溜側身遙望心難言

冰床

元冥秉權嚴寒凝大河小河胥堅冰帆收楫卸舟不行  
深臨薄履同兢兢伊誰造車牀假名長方四尺象厥形  
伏羲未作禹未乘泥橛山樁堪并稱木軀金趾堅而輕  
一人背挽牽以繩琉璃一片如鏡明一碧澈底寒且清  
殘荷敗苻縈蒼青伏流足下時有聲冒寒迤走遊興增  
我聞夷人窮北溟放舟萬里寒門經燭龍口噤煙不騰  
大鯤鱗僵難化鵬十往九死或一生今歲路阻明年仍  
心肝凍碎悍不停艱難卒得通東瀛從此天外開新程

人生萬事須專精畏難中止終無成華夷人同豈異情  
何事甘讓他族能自古勤惰判廢興

除夕祭詩

我生無能惟能詩卅年心力殫於斯束髮解吟鬢已絲  
行年卅四猶詩痴今年罷官無所爲得詩愈多句愈奇  
西山六度窮攀躋絕壁塗遍石盡緇兩月臥病憎參著  
誦詩已病當良醫三百六旬六日期日日有詩閒日稀  
光陰轉駒行歲移酒脯幸有聊祭之去年今夕我未歸  
鄭州守歲嗟旅羈醉來土牆曾留題星輶暫駐多光輝



屏居京國貧莫支差喜團聚無別離提壺舉椀忙諸姬  
騷壇助祭有兩兒富貴營苟空心馳眼前有樂翻忘遺  
此樂島佛知未知枯禪坐冷詩難肥海風捲山火礮飛  
瘴煙萬丈搖黑旗越裳血戰已有時我輩偷安猶笑嬉  
百篇一斗亦可嗤雕蟲小技將何施心肝嘔盡晦莫追  
兩手戰兢難縛雞 國恩未報需何時馬齒又增老病  
催人生祭詩能幾回詩稿愈厚志愈衰津沽連營屯虎  
貔渤海指日堅冰開世人皆樂我何悲詩成投筆進一  
杯滿雲爆竹聲如雷

紫姑曲

迎紫姑迎紫姑惟姑實相予嗟予艱苦姑不殊主人待  
姑非寡恩大婦嫉姑不許見主人迎紫姑願姑鑒予言  
愧予有疾非盛顏不求主人重得歡但求姑佑大婦賢  
主人家室方艱難

失巢燕

失巢燕徘徊悲鳴不忍去回視新巢侶紛紛半在幕喃  
喃久觸豪奴怒網羅倖未濯挾彈潛窺亦可懼何日啄  
魚西海濱結窩銜歸獻主人舊巢雖失難忘恩

醉司命

柏葉兮麻莖羅陳兮盈庭瓜圓兮玉潔吳飴伴兮遼餽  
春酒熟兮糟美塗厥門兮乞靈嗟皆醉兮世人蓀何爲  
兮獨醒彼酒星之沈酒兮固昏飲以爲常比錢神以爲  
伍兮羌歡樂而憂忘竊北斗以挹注兮飫天上之雲漿  
羣仙聚飲而酣臥兮任海槎游泳於銀潢天雞醉兮不  
肯鳴九閭閉兮寂無聲乘元雲兮抗獨行離居負兮難  
共登維蓀之神兮司在命愆長劍兮爲民正折瑞華兮  
將奚贈不寢近兮嗟老病羌幼艾之胥擁兮胡置一人



登天撫彗兮又將布新酴酥行熟兮馬又加齒老冉冉  
 既極兮徒貽笑於山鬼靈風起兮雲旗飛蓀忽逝兮不  
 可追嘉在樂兮旨在壘忽不顧兮棄如遺信人命兮離  
 合有數數能命天兮天亦代司愧媚神兮無術何不舖  
 其糟而飲其醜題本小樂府因憶楚辭有司命二歌戲倣其體以博一笑

登高邱而望遠海

登高邱望遠海遠海不可見近海咫尺眼前在銀臺金  
 闕相新鮮雲中往來人萬千云是王母厭住崑崙巔欲  
 往移居普陀洛伽山仙官多醉眠神將鬚髮斑層城地

高天事繁况值魑魅魍魎羣垂涎天步學未成任天獨  
步天更難偷桃謫落難歸班醉招杞愚私憂天臣朔飢  
欲死遠望不敢言

哀病馬

哀病馬哀病馬毛皴筋骨僵飢疲臥櫪下一時足偶傾  
屏棄不復乘恐招圍人怒見主低首弗敢鳴黔驢腹飽  
大如駮揚鞭驟過縱復橫哀病馬馬病不自哀欲報豢  
養恩自忘身虺虺願剝革裹戰士尸不願老死空廐埋  
敝帷

聽鶯曲

流鶯弄舌如簧巧悅耳絲蠻勝羣鳥主人年老最喜聽  
愛惜兼誇羽毛好鷹隼宜秋不合春飢啼那得出風塵  
鶴鳴縱使聲聞墊祗恐天高聽不真

上之回

君毋歌上之回君歌上之回使我心傷悲我聞漢之隆  
年年駐蹕甘泉宮避夏遂北之回中回所中朝諸國南  
交與北漠畏懷罔不服誠哉千秋萬歲樂無極

雙塔寺傍古井歌



大街橫亘西長安上有雙塔凌星躔下有古井潛甘泉  
中藏范公殉國之忠魂一死今踰二百年熱血浸泉泉  
不寒丹心照耀龍驚眠其魄入地魂上天侍帝傍從  
其君求之不獲見景山知君死國非南遷大哭破涕生  
笑顏吁嗟乎君死山臣死水水弗竭山弗圯亡國君臣  
乃如此天心雖眷天命改君烈臣忠共千載

鷓鴣詞

鷓鴣復鷓鴣自好其名常自呼向日而飛性何愚翼弱  
安得凌天衢太陽未生夜光孤霜寒露冽良可虞樹葉

薄且小縱能覆背愁不敷何如暫休破巢中飢栖聊以  
養諸雛而况鉤勒格磔人久耳厭聞隱矰匿繳繁有徒  
鷓鴣復鷓鴣我言爾記慎勿疏慎勿好名常自呼

起蟄蟲

起蟄蟲當春陽蛇虺出澗壑壁虎緣垣牆蟹蟲甘人臭  
味穢白晝結黨行幃牀毒物應候動天地不能強之使  
潛藏有蟲有蟲生朔地嚴冬長號肌肉瘁今年春回晚  
二月雪猶山谷滿羽毛落盡再茁難百鳥得意鳴此蟲  
依舊半夜常號寒嗟嗟此蟲休怨天天無私地處偏

征人怨

征人怨征人怨不怨無時歸但怨無時戰不戰復不歸  
頻年遠戍終胡爲消磨精銳敢自惜健兒轉眴頭皆白  
欲報國恩戰不得

古松歌

松樹胡同橋東人家  
牆外枯立有榆覆之

古松枯植依頽垣遺世獨立如畸人木朽草腐慨何限

生意盡矣名猶存

相傳斲斲  
名以此樹

脂香凝乾絕蠹蝨皮老剝

盡消龍鱗屹然凌虛作礧柱直無枝幹深有根白榆多  
錢陰翳繁遮頭葉密青紛紛當天日高照不到匠石物



色迷風塵高僅羸丈圍紉尺大材中斷嗟摧殘不成梁  
棟不椽椀繩墨難中巡斧斤稱名委巷良有年肩摩轂  
擊磨更堅雨露難承負天澤冰霜不解忘歲寒同時舊  
友共圖畫榮枯異路難相憐紅梅春先隔嶺表黃竹秋  
老遺江干棗林僻遠街同傳阜成門內棗林街  
有棗樹高數丈南北對  
峙差比肩生成芒刺惹撲打赤心空任羣兒攀何如茲  
樹早枯槁人棄弗取天得全年深靈氣聚不散仙苓化  
出奇且神作歌歌松當贈言盛衰有數違物難但愁老  
朽無所用枉受當日栽培恩

公無渡河

公無渡河公無渡河公幸不死其奈民何地破天驚夢  
中無聲民命已矣公夢未醒馮夷馮夷乘螭而馳靈螭  
性躁公來何遲地下河寬天上河仄地河一丈天河一  
尺鷹隼怒擊夫高聲卑水中魂溼向天空嗚公無渡河  
公無渡河公不渡河民奈公何

擬嵇叔夜幽憤

詩言志言不由衷何爲詩消寒三九詩有擬幽憤  
非叔夜僞作叔夜語豈但無病呻乎爰反之而效

其體仍題曰擬

我生性躁長復尙氣兼之酒狂更無顧忌動則發憤自  
負激義意氣擾心涵養未至老近身閒盛氣漸平病復  
戒酒才衷常醒閉門讀書晏寐夙興以藥當酒口苦心  
清新交無人故交亦少二三詩人半於我老飲則無量  
食則盡飽隨意唱酬不求詩好不思既往已過難追不  
謀未來事變難知豈無憤寔轉念自解偶爾躁妄旋復  
自悔欺我凌我所利有幾早晚與我同歸於死半生勞  
心心血漸乾餘血幾何養之良難奈何抑抑自求不懽



情怒理遣天君泰然空庭獨立月明人靜積雪滿地枯  
樹無影萬念俱空心忘此身不知有心憤於何存我少  
濫交豈無負我僥倖天佑未罹於禍雖有仇隙一死盡  
捐作鬼報復世有幾人遇難平事作既死想方寸腐肉  
詎知怏怏叔夜將死猶作憤詩所生不辰悔之已遲我  
生也幸幸值平時本無幽憤姑反和之

偶齋詩草內次集卷十

宗室寶廷竹坡著

仲春望後三日消寒九集是日九盡

消寒結社人無幾始終得人七而已其人雖少人各殊  
酒客詩豪萃於是孝廉太守又將軍廢官窮儒兼道士  
光陰劇速況詩催轉胸梅花紅滿紙消寒結局屈今朝  
九九雅集自茲弭蕭齋分詠晝拈題薄暮詩成飲燕市  
莫嗔雅俗太不倫酒債尋常任人訾燈前把酒默不歡  
勉強酢酬倦且息人少多達老轉癡老朋友勝少昆弟

願見故人復怯見每見悲感雜歡喜餘生聚處知幾年  
况復遠別將萬里探驪舊伴十九散茲會賸我三人耳  
今年消寒縱有會朔南分吟嗟彼此後會應訂十年期  
白石每云十年歸里再同唱和我年最少六旬抵神仙延齡應可候我  
縱苟活亦餓死人喜今日佳會終我道散場今日始却  
羨同席年少人酒入紅顏溢丰彩吁嗟乎人生行樂人  
須生樂遠死近不相待九泉滴酒骨不知鮑家誰見詩  
吟鬼及今別期寬數旬餘寒消盡韶華美治裝得暇且  
頻醉歡會有恨歡增倍當前有樂莫錯過別後追思空



自悔

鞭聰明

鞭聰明聰明何忍鞭我兒聰明一回鞭汝耶之齒增一  
年聰明不如愚魯好聰明添多福減少兒愈聰明耶愈  
老聰明滿腹腹難飽不見阿耶年幼時聰明絕頂勝我  
兒

喜雪

開門滿地白鳥鵲盡飛還豐歲知有兆窮愁幸漸刪呼  
兒檢簞笠與客出郊關敢爲民生慶閒身且看山

人日

年華物候枉相催，彈指靈辰春未回。  
醉臥不知新歲過，屏居猶有故人來。  
滿庭殘雪月欲落，一夜北風雲盡開。  
七日虛拋始相見，餘生幾許莫辭杯。

空齋團坐冷筵開，把盞聯吟漫遽回。  
窗映雪光明硯水，牀橫月影印盆梅。  
羞將幡勝簪蒼鬢，聊借辛盤佐綠醅。  
人日今年真不負，詩儔酒伴一齊來。

冬夜

朝陽遲未出，明月漸西移。  
斗柄耿中天，列宿相追隨。  
海

風促嚴寒枯木愁折摧天雞慵未唱栖鴉噪何爲驚聞  
欲出視起坐還解衣豈其畏霜露昏夜行匪宜假寐聊  
養神作息當順時

長夜何漫漫萬家同酣睡街柝寂無聲怯寒牆下避惰  
犬樂飽臥腹果倦不吠穿窬冬正多潛行肆無忌念此  
愁難眠一誤豈容再春開曾  
被竊忽憶海外國形勢與我對  
我方夜無爲彼正晝有事

和東坡饋歲別歲守歲

東坡思故鄉作詩首饋歲京華重年禮與蜀差不異中



歲晚相與饋問  
呼爲送年禮

閒居四五年交際禮久廢惟有西山僧

歲時仍贈饋黍糕豆其中麩餅圓其外麩筋然柏薰入  
口煙嵐氣飽餐胸胃清振觸故山思公多方外交可曾  
知此味和詩寄山中聊以酬雅意

東坡賦守歲年未及四十我和守歲詩年已四十八門

生共兒子相伴坐一室飲酣聯新詩苦吟忘時節

康君  
步崖

來同守歲康生亦年少離家隔關越同愁各一心傷老等傷

別兩年爭一宵少縱歎卽逝怕看北斗斜閉戶不敢出  
羨彼年華富老近嗟多疾縱教齒不增早衰難苟活

歲暮書懷

破窗號暗風，鑪火照梁紅。人事豈無變，天時猶有窮。悲  
歡一年盡，勛業半生空。老屋宵深靜，牢悲況病中。  
聞說秋河決，橫流四月餘。災荒慚坐食，饑溺幸閒居。濟  
瀆淤誰濬，淇園竹久虛。陽春行已到，解凍況徐徐。  
委巷存松樹，枯乾經幾時。歲寒真不解，春到那能知。幸  
免薪樵劫，敢生梁棟思。何因名尚在，腐朽詎神奇。  
多病身衰早，頽唐臥敝廬。乾坤欣暫靖，歲月歎將除。有  
累難歸隱，無能且著書。名心銷已盡，但愧此生虛。

大雪滿燕京西山盡入城朝陽出東海天地共光明對  
此清潔景何生離別情翠微晴在望去歲共遊行

春夜

薄霧淡殘月微風添嫩寒不眠知夜短多病覺醫難倚  
枕旬頻索挑燈書自看老姬煨芋熟絮絮勸加餐

哀病馬

哀鳴伏櫪幾經春健足誰知本絕塵一自歸山成棄物  
迴思要之駕亦前因殘生那有酬恩日不死難逢市駿人  
慚愧飢飬筋力減翻愁重遇九方歎



和陶貧士

休官歸京華依舊如貧士閒居常閉門彈指逾三載欲  
耕苦無田卻羨彭澤宰破書幸未賣留取教二子老近  
復添丁學語未滿齒見耶索筆墨一笑塗盈紙豈不憂  
困窮尙可賒布米迴思未仕時未必得如是餘年猶幾  
何人生原爾爾

我生病輕躁事事難學公一事差解嘲賦詩頗能工當  
年好交遊濫取安有功年來喜漸少大都如我窮時來  
賒酒飲唱和相爭雄陰雨悶無客聯句呼兒童詩成笑

問兒汝何如乃翁

少陵老有句途窮仗友生友少苦累多瀆求人豈勝閒  
居三年餘債與齒俱增縱教有報日今生恐未能無聊  
語兒子受惠須記清

少賤不畏辱少貧不畏勞習慣若性成凡事視所遭行  
年近五十斑斕見二毛好山老更甚結伴時遊遨乞來  
五夷竹方節如人高製杖不離手登陟忘險遙時復藉  
酒興賭勝同兒曹奇峯偶先登長歌頗自豪下視同行  
人倚杖笑且嘲所恨拘束多累重家難拋五嶽僅遊一

筋力嗟漸凋

聞鶯

柳浪綠參差西湖水漲時下喬懷往事求友歎誰知  
曉音原好綿蠻調劇奇山深春不到出谷敢嫌遲

春日感懷

老近哀樂倍春歸天地新有情憐異類無謂笑閒身  
雲幕日如月風篩雪似塵韶華猶寂寞醉臥負良辰  
京國閒居久乾坤一醉人難憂天下事強樂死前身  
日促西山雪風遲北地春感時聊縱酒閉戶忘家貧



鬱鬱果何事窮途常獨愁有名身後累不死老來憂山  
冷雨成雪風多春似秋幽懷思一寫無那且閒遊  
物候閒中換靜觀姑遣愁雪消驚草茁冰薄見魚遊仕  
隱兩無著窮通皆可憂人生幸有命順受復何求

春日感懷

寒風尼春色萬卉遲生機令節踰中和寂寞如冬時傲  
裘幸未興猶復粟生肌久閒習苟安多病催早衰寒燠  
由氣候天心詎有私唐花獨先開造化知未知

今年春寒久二月寒轉增城河昨已開曉起復有冰向

陽隄土潤遠望草已青應候鳥當言胡爲寂無聲豈其  
懾寒威閉喙不敢鳴蟄蟲竟早出緣壁飛有蠅感之獨  
長歎物理紛難明病軀慎自攝閉戶聊養生

少年不如意自慰未遽老轉胸老已近奢心望壽考富  
貴憂患多貧賤歡樂少人生不蓋棺事多何日了不如  
且飲酒醉臥温且飽

### 秋海棠

西風滿地淚痕香春睡吹醒又晚妝性潔那堪沾夜雨  
質嬌不敢向秋陽何須高照燒紅燭且趁涼宵奏綠章

卻笑梅花情太重良緣再結又何妨

此題廿年前詩社曾詠之今芷仙復以命題欲抄  
 舊作不願欺人且亦嫌其未佳蓋此題陳陳相因  
 語頗多非白描不能出色而白描甚難竭一夜苦  
 思得數聯無真愜心者姑湊成一首塞責餘不耐  
 再湊附錄以質同人  
 夜雨牆陰秋有淚西風庭院睡初醒秋陰未識可  
 重乞春睡豈真猶未醒思婦淚乾猶帶血貴妃睡  
 足已非春思婦淚香啼夜月貴妃睡足喜西風別  
 淚豔凝千點血輕陰深護一庭秋

苦熱

出月色如日照雲成霞紅巽二避炎暑入夜仍無風連  
 朝霽積雨竟日驕陽烘水氣溽若火夜半猶滿空怯燭



不敢近拋書心忡忡無聊望明月眼赤雙朦朧投牀竹  
簟膩汗沾膏血濃閉目見大海不辨西與東火山四紛  
羅黑煙生奇峯行人腴赤體地坼山全童人言此火地  
外夷猶未通天心眷中華留此爲附庸惜哉中國弱兵  
緇財不豐近屬漸人奪遠境安能攻瞿然大驚寤熱血  
沸五中呼兒取冰冰一吸癡想空

五日讀離騷

閒居無所事令節仍閉門反舌已無聲鳴蜩猶未聞蜀  
葵放階下獨守舊日根感時驚物候且自開蒲樽離騷

少所喜年來久未溫姑作下酒物絕勝肴饌陳愈讀飲  
愈豪酒盡杯空存聊復肖名士豈爲哀忠臣

初夏襟感

初夏閉門坐葵花滿院新沁微偏向日放晚不爭春酒  
醉時忘我身閒常傲人幸逢弭兵葦伏處莫憂貧

餘春歸未盡花事到豐臺芍藥沿門賣買來剛半開呼  
童速賒酒對妾共銜杯醉後有真樂不知生可哀

四序景雖異佳時總在新窗蕉聲助雨階藥色留春今  
古幾平世乾坤誰樂人閒身聊笑傲何事可求真

大風號永晝初夏似深秋新葉綠將碎殘花紅不留  
隱憂歸醉臥壯志付窮愁藩服西南少邊關事孰籌

擬白香山不如來飲酒

休說登科好虛名誤到今廿年醒幻夢一舉忘初心  
見餌魚難返開籠鳥莫尋不如來飲酒醉臥且長吟

休說官場好荒唐劇可嗤才疏臨事忘恩重罷官知  
風逆川偏濟雲低霖妄爲不如來飲酒閉戶學聾癡  
休說衡文好誰稱真試官搜羅神枉費辨別力空殫取  
士得名易問心無愧難不如來飲酒爭長向詩壇



休說星使好奔波勞遠行山川空過眼風月盡無情張  
網原求利乘槎枉得名不如來飲酒遊覽任縱橫

春鳥

春鳥復春鳥應候鳴須臾莫自詡能言春光已漸老  
春鳥復春鳥潛栖不敢嘯那堪求舊友飛散各東西

帝京元夕

帝京行樂地元夕聚遊人月比中秋好春同 聖澤新  
諫燈慚往事縱酒笑閒身幸覩 昇平景相隨踏軟塵

冬至

貧病交侵志氣頹佳辰欣遇強銜杯艱辛正苦冬難禦  
容易休言春又來鴻斷空隨天上日蟲僵猶待地中雷  
閒身喜得吟詩暇已結消寒社五回

重陽後十日遲菊詩社同人集偶齋賞菊分韻得

悠字

遲菊結社天始秋重陽凝想良悠悠花事更比人事速  
東籬秋老西風迥豐臺野人善栽植茱萸五色光盈眸  
老妾憐我與釵釧購買佳種勞索搜空齋秋色頃刻滿  
淵明魂魄時來遊登高已過詩債了騷壇結局招良儔

此社始於孟秋逢九出題收詩至重陽共七對花拈韻  
課今日面課以爲結局菊已大開社可散矣

借陶句以采菊東籬詩成酒熱聊自酬  
浥露掇英共酣

飲此物聞說能忘憂人誇延齡我厭吸不死  
隱憂何時

休吾聞菊花有二種華夷分道形不侔  
鄒小山畫譜於論菊有洋種

奇鬪巧詡新異九華減色如含羞涼颼吹霜  
逼荒徑雖

有傲骨姑垂頭生成形色莫爭勝天意不測  
難人由是

日正值秋序盡白藏欲去誰強留一年花事  
看將徧詩

囊滿積從此收人生能得幾佳句事實不盡  
君知不

### 秋陰曲



寒煙冷霧紛蕩漾似雲非雲難名狀明明皓月在天上  
仰頭莫見空企望暗風颯颯頻相吹不吹雲去吹雲來  
盛夏不能作霖雨涼霄凝結將何爲

秋蟬

柳疎槐冷各無情莫向危柯訴不平朝露已晞難飽飲  
涼飈漸起敢輕鳴重飛休作來年想高唱空留昔日聲  
猶恐螿螂暗相伺深藏葉底盡餘生

感遇

朔方有病馬矯矯本良材雖非千里足款段恥同儕主

人偏鍾愛珍重擬龍媒歧途偶要駕屏棄途如遺一朝  
邊事起驚驥盡驅馳崎嶇困負重失足同鞭笞荒野任  
游牧饑渴免勒羈未酬豢養恩臨風自傷悲但恐無王  
良控制從嬖奚低首臥衰草老死毋長嘶

鱷魚海上來自恃爪牙利乘潮入江口人物恣吞噬開  
門揖盜進盜亦忘死地可惜網罟小食飽任長逝彼固  
頭角傷我亦梁筍壞何如備強弩從事海門外

步出東門外大道多行人借問何處來來從析木津津  
門接大海南下通七閩烽煙望不斷鹿耳依鯤身螺舟

疾若風萬里同比鄰  
津沽慎鎖鑰咫尺通  
郊閩聞言驚東望不  
見渤海濱兵戈喜猶  
遠苟安聊逡巡

涼風吹萬木肅然時  
物改盛夏慨已過餘  
芳賸無幾履霜馴堅  
冰陰凝自茲始所幸  
陽未盡生機猶弗已  
春回安敢望惟祝常  
如此

威鳳感德鳴喈喈世  
稱瑞廉雞啼報曉知  
時人亦貴奈何蝸與  
螻噪暑如羹沸徒招  
聽者厭朝夕猶嘒嘒  
豈伊敗於多厥聲固  
有異一鳴能驚人原  
非燕雀輩

木芍誇天香開難歎  
落易黃華標晚節風  
霜慨憔悴俗



豔足四時叢生嗤月季豈其培植殊種類判賤貴草木  
本無心榮瘁有天意

秋水

長天一色浩無垠極目澄鮮絕點塵澈底誰真如此水  
在中知否是伊人蘆花明月添新夢桃浪春風憶舊因  
偶讀南華增感慨望洋歎息自傷神

羊頭肉

肉食休云鄙封侯屬此君虎頭雖貴相僅得號將軍封  
侯雖匪難數奇惟自歎無端項劇強百鍊弗肯爛犬豕

莫同比曾聞挂角奇可憐因悅草竟致送頭皮

糖胡盧

胡盧穿纍纍咀嚼蜜滿口外視儘光華中心隱枯朽

番薯

薯糧南海種稱奇釀酒充籩美似飴却憶雞籠諸士卒  
飽餐玉枕不愁飢

玉枕諸名薯灣多種番薯諸一作薯

春感用杜秦州禱詩韻

扶杖出西郭久傳目運宮人心異興廢仙道本虛空梅  
壓幾春雪松吹前代風長河發何處依舊水流東

春城嗟臥病風冷日飛沙時難羞歸隱途窮恨有家生  
涯原窘迫世路况欹斜所賸詩才富逢人且自誇

京邑酣歌候邊陲苦戰時營空軍士哭家破庶民悲遠  
道傳聞速雄師赴援遲昇平何以答昧昧盡思之

驚駘况老病休言筋力強縱教恩可報亦恐日難長要  
駕嗟騏驥軼塵憑驪騮春郊容自放藏拙感穹蒼

海外有高山山橫夷夏閒城危沙作障地仄水爲關又  
說重圍合何時振旅還巖壘風浪猛珍重保衰顏

定論憑千載孤衷付九泉生難真志遂死易倖名傳春



總來天上雲恒倚日邊韶華看滿眼東望意茫然  
臺古釣魚好憑高景出羣餘冰旋水溜殘雪亂山雲樹  
遠煙如接村多路不分偷閒聊釋悶世事願無聞

春日襟興

老近怯春寒經旬不出城今日天氣佳興到偶一行信  
步過河邊柳條漸已青微風起細波破碎時見冰人身  
如草木乘此大化生榮枯難自主有情同無情年華逐  
時變習見何須驚誰能學騷人觸物感輒興

秋菊經冬寒蕾凍開更遲愛此不忍棄案頭姑置之陽

春忽已來瞥見開一枝芳觀詫新異共道非其時鬱發  
隨寒暖得氣自不知萬事盡平常至奇原無奇

朝陽照春雪頃刻化新雨日氣蒸成煙蓬勃潤原土殘  
雪留山壘遠望垂素縷宿麥回凍青生意滿畝畝豐年  
喜有徵忻然羨農圃却悔好虛名久宦忘積聚買山囊  
少錢歸耕歎無所行樂敢非期冀免飢寒苦隨遇聊求  
安餘生有幾許

東風解殘凍清波漲前渡共說冰新開須知水返故觀  
此悟人生所貴守吾素禍福盡虛機偶爾適相遇

我生夙負氣言動多輕躁小事輒不忍事過每自笑行  
年四十六衰病近老耄酒醉興偶動故轍時復蹈勃然  
盛氣起或反過年少懲此欲止酒翼可戒狂暴朝戒夕  
已開見酒卽先酬君當恕狂人酒是我所好

冰融不見冰水凍不見水當前執幻相豈復知本體一  
朝水盡涸冰水兩安在臨川玩春流萬事悟如此

宮人斜

宮人斜古牆後堂傳靜樂跡無有鶴來滿眼淚石折華  
表朽豔骨一炬紅成灰百年化土灰難飛幽魂千縷聚



一井陰泉浸魂冰雪冷生無名位死無墳斜陽衰草秋  
復春貴賤轉頭皆埃塵永和鸞噦空傳聞却羨蜘蛛猶  
有墓人不如物良悲辛玉鉤古迹留雷塘兩朝興廢俱  
可傷我未憑弔別有感因循酷烈同歸亡

擬韋蘇州夏冰歎

上有當陽普照之烈日下有凝寒不解之堅冰羣陰聚  
積凜難散朱明恍惚成元冥本來下流弱無力得氣成  
形堅若石泥沙混濁襍魚腥幻作水精清且白應時薦  
廟貴無倫難得爲美少見珍偶然解暑亦有用周調梅甘

冽娛醉人勸君珍重勿過食陰寒適口身無益

### 壯志

我有一壯志欲使四海枯蛟螭盡餓死翹翹皆避居手  
持夫子鐸徧喻諸國都共使被冠履擊鼓吟笙竽步僵  
愁足爾勢弱憂力孤無能且痛飲酒盡悲空壺

### 暑雨書懷用放翁原韻

老來強自學和平酷暑難堪心總清已爲疎狂負當世  
聊將詩酒盡餘生閒居屢易炎涼候醉臥不聞風雨聲  
幸得干戈成玉帛海行無復避鯢鯨

兵銷且喜言承平  
耽飲何愁暑不清  
却病未能違避世  
謀身無術況民生  
狂風暴起樹欲裂  
驟雨將來雲有聲  
遙憶嶺南山水發  
萬家漂泊逐長鯨

濃雲低覆與檐平  
溽暑侵人那得清  
有酒聊憑磨永晝  
無才深悔作儒生  
迴風逼雨難成陣  
急電催雷不斷聲  
醉夢昏昏忘早晚  
忽聞鄰寺吼華鯨

飲冰

解暑祛炎信首功  
焦煩滿腹霎時空  
至今始覺寒於水  
憶昔徒教熱在中  
入口清涼無可比  
盟心潔白本相同



玉壺雪粒存真味切莫曉曉語夏蟲

夏日裸興

僻巷閉門住優游詩自哦閒居新友少永晝夕陽多老  
近心難壯憂深氣漸和飢餉何足慮暫喜免兵戈  
又到炎歊候蕭條歎更貧功名銷壯志婚嫁累閒身耽  
酒渾忘老歸田每羨人故山隔井里雨洗色彌新

山居禩興

梵宇傳香界莊嚴信絕倫迎... 鑿曾昔歲避暑又何人  
迴首盛時遠驚心遊客新悠悠家國事把筆暗傷神

夏蟲四詠

棘樊隨所止拔劍豈能驅聲色盡堪亂乾坤何處無趨

炎原爾爾逐臭任夫夫故紙鑽難出羣飛亦太愚

蠅

未到花生齷狂吟且作威負山何量力食肉亦能飛得

意儼成市潛踪時入幃棄捐笑統扇在篋不堪揮

蚊

本來積灰化鳥吐古曾聞善走黠殊蠢無聲毒過蚊見

人彌跳躍得十更紛紜枉費蟾螭捕空言笑檄文

蚤

居然著朱紫饕餮飽膏脂笑爾本無血伺人如有知生

來甘附諸死去枉留皮可惜徒遺臭匆匆能幾時

蟹

雪夜詠懷

閉戶不知雪但聞窗打風寒威增永夜愁緒積幽衷異  
域誇兵足京華辛歲豐閒身免飢餓醉臥學癡聾

聞說朝鮮國窮冬雨雪多中華勞遠戍他族肆連和壤  
地通山徑關津共海波前朝歸順久職貢絕干戈

蒿目西南徼兵強說緬夷近聞遭外侮昔記抗王師

豈有同盟好而將屬國欺中山始淪沒示弱悔當時

反側不成寐披衣階下行暗花沾袂濕遠樹隔墻明夷  
夏誰無死乾坤我枉生未妨甘凍餒但願久承平







太子亦英杰惜哉生非時迴憶昭王世彼彼盛茲何衰盛  
衰亦何有所重在人材  
燕太子

歲暮感懷

閒居豈有不平鳴蒿目時艱萬感縈壯不如人甯速老  
死仍無用且虛生亂雲遮月明星大驟雪敲林睡鳥驚  
晝短天寒兼歲暮蕭森朔氣滿燕京

窮途有血皆成淚晏序無聊祇詠詩今古幾逢平治世  
乾坤正值苦寒時風翻四海中華小氣阻三春歲月遲  
幸賴濁世堪破寂沈酣醉臥學狂癡



元日立春

曉起東風撲面勻，昨宵斗柄已迴寅。詩逋酒債一年滿。

春色歲華同口新。寶座進呈傳舊禮，玉墀拜舞列

宗臣。閒居老病才思減，愧少佳章賀令辰。立春例進春山寶座辛

已廷在禮部曾與此禮

男

富壽  
富壽

謹編

積廉

椿壽

恭校

達聰

達壽